

UDHËZIM
Nr.9, datë 18.2.2011

**PËR PROCEDURAT E NJEHSIMIT TË DËFTESAVE/DIPLOMAVE TË SHKOLLAVE
TË MESME DHE REGJISTRIMIN NË MATURËN SHTETËRORE 2011 TË SHTETASVE
SHQIPTARË QË KANË KRYER ARSIMIN E MESËM JASHTË SHTETIT**

Në mbështetje të nenit 102 të Kushtetutës së Republikës së Shqipërisë, nenit 13 të ligjit nr.7952, datë 21.6.1995 “Për sistemin arsimor parauniversitar”, të ndryshuar, të vendimit të Këshillit të Ministrave nr.78, datë 8.2.2006 “Për krijimin e Maturës Shtetërore dhe pranimet në shkollat e larta publike”, të ndryshuar,

UDHËZOJ:

1. Shtetasit shqiptarë që kanë kryer arsimin e mesëm jashtë shtetit, kanë të drejtë të vazhdojnë programet e studimit në institucionet e arsimit të lartë (IAL) me kohë të plotë dhe kohë të pjesshme në Republikën e Shqipërisë, me kusht që të zotërojnë gjuhën shqipe në një nivel të pranueshëm për të vijuar studimet universitare. Zotërimi i gjuhës shqipe vërtetohet nëpërmjet dëshmisë së provimit, që zhvillohet mbi bazën e programit për të huajt pranë Fakultetit të Histori-Filologjisë në Universitetin e Tiranës. Procedura e dhënies së provimit të gjuhës shqipe, programi dhe tarifa e këtij provimi, përcaktohen nga Fakulteti Histori-Filologjisë në bashkëpunim me Drejtorinë e Arsimit të Lartë dhe Kërkimit Shkencor, në Ministrinë e Arsimit dhe Shkencës. Koha e dhënies së provimit të gjuhës shqipe pranë Fakultetit të Histori-Filologjisë, është brenda muajit maj 2011.

2. Nga detyrimi i dhënies së provimit të gjuhës shqipe përjashtohen të gjithë ata shtetas, të cilët kanë vazhduar studimet në shkollën e mesme në institucione arsimore, që kanë program mësimor në gjuhën shqipe, ose ata shtetas që e japin gjuhën shqipe dhe letërsinë si provim të detyruar të Maturës Shtetërore.

3. Ministri i Arsimit dhe Shkencës ngre një komision të posaçëm pranë MASH-it për të shqyrtuar kërkesat e shtetasve shqiptarë, që kanë kryer arsimin e mesëm jashtë vendit.

4. Shtetasit shqiptarë që kanë përfunduar shkollën e mesme jashtë vendit, paraqesin pranë komisionit të posaçëm, nga data 1 deri më 15 prill, dokumentet e mëposhtme:

- kërkesën me shkrim për të vazhduar një program studimi në IAL;
- dëftesën/diplomën origjinale së bashku me listën e notave të të gjitha viteve të shkollës së mesme, të përkthyer dhe të noterizuara;

- kopje e noterizuar e pasaportës ose e kartës së identitetit;
- dokument zyrtar nga vendi që vjen, i cili vërteton se cikli i studimeve të kryera nga shtetasit shqiptarë në atë vend dhe profili i shkollës së mesme që kanë përfunduar, u japin të drejtën të vazhdojnë studimet universitare ose shkolla të larta jouniversitare në vendin ku kanë studiuar.

5. Në rastet kur komisioni i posaçëm vlerëson se shtetasit shqiptarë, që kanë kryer arsimin e mesëm jashtë vendit, nuk kanë dhënë provimet ekuivalente me Maturën Shtetërore (D1, D2, Z1 dhe Z2), për t’u pranuar në IAL, shtetasit duhet:

a) të japin si provime të detyruara gjuhën shqipe e letërsinë dhe matematikën, ose një nga gjuhët e huaja të listës së lëndëve me zgjedhje, e konceptuar sipas standardit të testit të gjuhës shqipe dhe letërsisë (D1), si dhe provimet me zgjedhje sipas procedurës së përcaktuar në rregulloren “Për zhvillimin e provimeve të Maturës Shtetërore 2011 në Republikën e Shqipërisë”;

b) pas përfundimit të detyrimeve të përcaktuara në pikën 5.a të këtij udhëzimi, shtetasi shqiptar që ka kryer arsimin e mesëm jashtë vendit, pajiset me një certifikatë të dhënies së provimeve të detyruara dhe të atyre me zgjedhje. Ky dokument lëshohet nga Agjencia Kombëtare e Provimeve.

6. Në rastet kur komisioni i posaçëm vlerëson se dokumentet shkollorë të shtetasve shqiptarë, nuk provojnë dhënien e provimeve me zgjedhje të Maturës Shtetërore, por vetëm ato me detyrim, D1 dhe D2, atëherë ky komision përllogarit notën mesatare të viteve të shkollimit dhe nota e provimeve të detyruara D1 dhe D2. Në këtë rast, shtetasi shqiptar është i detyruar të japë vetëm provimet me zgjedhje.

7. Komisioni, pasi njezh vlefshmërinë e dëftesës/diplomës shkollorë, mbi bazën e dokumentacionit të paraqitur, përcakton provimet që do të japë shtetasi shqiptar sipas rasteve të parashikuara në pikat 5 dhe 6 të këtij udhëzimi dhe përcjell zyrtarisht dokumentacionin në KMSH-në e DAR/ZA-së ku shtetasi shqiptar ka vendbanimin, deri në datën 30 prill 2011.

8. KMSH-së e DAR/ZA-së i përcjell këto të dhëna në AKP dhe cakton shkollën ku kandidati do të japë provimet e Maturës Shtetërore.

9. Formularët A1Z të plotësuar nga kandidatët për të cilët bën fjalë ky udhëzim, dorëzohen zyrtarisht nga DAR/ZA në AKP, së bashku me përmbledhësen e të dhënave të tyre, brenda datës 5 maj 2011.

10. Shtetasit shqiptarë që duan të studiojnë në programet e studimit të IAL-së me kohë të pjesshme, përveç kritereve të parashikuara nga ky udhëzim, u nënshtrohen edhe kritereve të parashikuara nga udhëzimi i posaçëm i MASH-it për këto programe studimi.

11. Në rastet kur komisioni i posaçëm vlerëson se shtetasi shqiptar i ka kryer të gjitha detyrimet e Maturës Shtetërore dhe ka dhënë edhe provime pranimi për në universitetet ose shkollat e larta jouniversitare të vendit nga ku ai vjen, atëherë komisioni përlllogarit notën mesatare, notat e provimeve të detyruara dhe me zgjedhje, dhe ia përcjell dokumentacionin Agjencisë Kombëtare të Provimeve. Në këtë rast, shtetasi shqiptar do të vijojë plotësimin e dokumentacionit me formularin A2, pranë KMSH-së së DAR/ZA-së ku ka vendbanimin e tij.

12. Ngarkohen për zbatimin e këtij udhëzimi: Sekretari i Përgjithshëm, Drejtoria e Edukimit Parauniversitar, Drejtoria e Arsimit të Lartë dhe Kërkimit Shkencor, Drejtoria e Bashkëpunimit Internacional, Drejtoria e Marrëdhënieve me Median dhe Publikun, drejtoritë arsimore rajonale dhe zyrat arsimore.

Ky udhëzim hyn në fuqi menjëherë dhe botohet në Fletoren Zyrtare.

MINISTRI I ARSIMIT DHE SHKENCËS
Myqerem Tafaj